

ORIGINAL

Apelacioni sud Brčko distrikta Bosne i Hercegovine u vijeću sastavljenom od sudija Damjana Kaurinović, kao predsjednika vijeća i sudija Ilje Klaić, Srđana Nedić, Maide Kovačević i Dragane Tešić, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi Instituta za ... d.o.o. Z., na osnovu člana 2. i 26. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti („Službeni glasnik Brčko distrikta BiH“, broj 45/10), na sjednici vijeća održanoj dana 24.05.2012. godine, d o n i o j e

R J E Š E N J E

Inicijativa za pokretanje postupka za ocjenu usklađenosti Odluke Skupštine Brčko distrikta Bosne i Hercegovine broj 01-02-319/10 od 02.12.2010. godine o povjeravanju javnih ovlaštenja stručnoj instituciji za stanice tehničkog pregleda vozila u Brčko distriktu BiH, sa članom 13. stav 4. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10) SE ODBACUJE zbog nenadležnosti.

O b r a z l o ž e n j e

Institut za ... d.o.o. Z. podnio je dana 14.02.2012. godine inicijativu radi ocjene usklađenosti Odluke Skupštine Brčko distrikta Bosne i Hercegovine broj 01-02-319/10 od 02.12.2010. godine o povjeravanju javnih ovlaštenja stručnoj instituciji za stanice tehničkog pregleda vozila u Brčko distriktu BiH, sa članom 13. stav 4. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10).

U inicijativi je navedeno da je donošenju osporene odluke prethodio postupak izbora stručne institucije u kome nije bilo dozvoljeno ulaganje pravnog lijeka zbog čega je podnosilac inicijative podnosio tužbu radi pokretanja upravnog spora protiv Preporuke komisije za izbor stručne institucije kojoj će biti povjeren dio poslova iz nadležnosti Odjeljenja za javne poslove broj 03-26-040676/09 od 25.10.2010. godine i Odluke Skupštine Brčko distrikta Bosne i Hercegovine broj 01-02-319/10 od 02.12.2010. godine o povjeravanju javnih ovlaštenja stručnoj instituciji za stanice tehničkog pregleda vozila u Brčko distriktu BiH. Tužba je odbačena kao nedozvoljena rješenjem Osnovnog suda Brčko distrikta BiH broj 96 0 U 026324 11 U od 01.04.2012. godine, uz obrazloženje da predmetni akti nisu upravni akti, a rješenjem Osnovnog suda Brčko distrikta BiH broj 96 0 U 031905 11 U2 od 29.12.2011. godine odbijen je kao neosnovan i zahtjev za zaštitu sloboda i prava. Rješenjem Apelacionog suda Brčko distrikta BiH broj 96 0 U 026324 11 UŽ od 16.11.2011. godine navedena odluka Osnovnog

suda Brčko distrikta BiH broj 96 0 U 026324 11 U od 01.04.2012. godine je potvrđena.

Članom 1. stav 2. Zakona o postupku ocjene usklađenosti pravnih akata Brčko distrikta Bosne i Hercegovine, propisano je da se ne može voditi postupak ocjene usklađenosti upravnog akta ili drugog pojedinačnog pravnog akta, osim ako zakonom nije obezbijeđeno pravo na žalbu, sudska zaštita ili drugi vid pravne zaštite.

Ne upuštajući se u kvalifikovanje Odluke Skupštine Brčko distrikta Bosne i Hercegovine broj 01-02-319/10 od 02.12.2010. godine o povjeravanju javnih ovlaštenja stručnoj instituciji za stanice tehničkog pregleda vozila u Brčko distriktu BiH, tj. da li je to upravni akt ili drugi pojedinačni akt, ovaj sud nalazi da je odlučujuće za rješavanje ove pravne stvari, činjenica da osporena odluka nije opšti akt čija se ocjena usklađenosti može tražiti prema Zakonu o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti („Službeni glasnik Brčko distrikta BiH“, broj 45/10).

Polazeći od načela da je pravna zaštita pravnih akata uvijek zagarantovana, podnosilac inicijative je imao mogućnost da, u skladu sa članom VI tačka 3. (b) Ustava Bosne i Hercegovine, podnese apelaciju protiv navedenih sudskih odluka Ustavnom sudu Bosne i Hercegovine.

Na osnovu iznesenog, odlučeno je da se zbog nenadležnosti, predmetna inicijativa odbaci u skladu sa članom 1. stav 2. i članom 18. stav 1. tačka a. Zakona o postupku ocjene usklađenosti pravnih akata Brčko distrikta Bosne i Hercegovine.

APELACIONI SUD BRČKO DISTRIKTA BOSNE I HERCEGOVINE

Broj: 097-0-OUS-12-000001

Brčko, 24.05.2012. godine

ČLANOVI VIJEĆA:

1. _____
Iljo Klaić

2. _____
Srđan Nedić

3. _____
Maida Kovačević

4. _____
Dragana Tešić

PREDSJEDNIK VIJEĆA

Damjan Kaurinović

